

## **Xitre Pawre kot Xitre hwÿr kagà nē mēnh**

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhũm pre Xitre Pawre hkôt pa hã mytwrÿ xohtô nē. Tã kêp Jejus kôt hkwyjê nhõ pastô kaxyw gô hipôk pê Kret ã arîk nē Tirtũm kapêr o mē ahkre ho mē hkôt pa. Jakamã nhũm Pawre kãm kagàja nhîpêx nē kamã kãm mēmoj tã karõ. Tirtũm kapêr o mē hêx xwÿnhjaja tanhmã kot ja nē mē hkuré to hã kãm karõ. Nē mē kot Tirtũm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karõ. Nē Jejus kwÿjaja kot axpēn to mex o pa hã kot mē kãm karõ kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karõ nē hã kagà nē hwÿr mēnh anē. Nē kãm:

<sup>1</sup> Pa Xitre? Xà amex? Ixpê Pawre na pa awÿr kagà nhîpêx nē kumē. Na pa hte Tirtũm mã tanhmã amnhî nhîpêx to ho ixpa. Nē ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nē mē kot hprî hã mar kaxyw Tirtũm kapêr o mē ahkre mex nē. <sup>2</sup> Mē kot inhmar nē nhÿrmã htyk nē ma Tirtũm mē Jejus wa hwÿr àpir nē wa kuri htîr tũm nē pa ho pa hã amnhî kukamã hamaxpêr kaxyw. Amnepê m na pre Tirtũm ã mē pahpê hkrajê hkukamã mē pajarēnh anē. Nē ãm hãmri ã

mě pajarěnh aně. Na hte měmoj tã amnhĩ to hêx kêt nê. <sup>3</sup> Tã ra mẽ pakukamã mẽ pamã mẽmoj to amnhĩrit nê inhmã kapër o:

—E Pawre kêr ka ma mẽ hpiitã mẽ hkôt ri apa nê mẽ kãm ixkapër jarẽ nê mẽ kãm: “Kot kaj mẽ amnhĩ kaxyw Tirtũm Kra hkôt ajamaxpër nê hkôt amnhĩ xunhwỳ nhũm Tirtũm ja hã mẽ apumu nê mẽ ato hkra. Ka mẽ nhỹrmã atyk tã nhũm amnhĩ wỳr mẽ ato api ka mẽ wa kuri amex kumrêx nê atĩr tũm nê apa ho apa.” Anhỹr o mẽ kãm ixkapër jarěnh o ri mẽ hkôt apa Pawre.

<sup>4</sup> Anhỹr o inhmã kapër tã pa ã amã ixkapër nê hã kagã aně Xitre. Pajamẽ pahte amnhĩ kaxyw Jejus kôt pajamaxpër nê hkôt amnhĩ xãm jakamã te apê ixkra pyræk. Jakamã na pa hte ato Měpanhĩpêêxã maati Tirtũm mẽ mẽ papytãr xwỳnh Jejus Krisja wa hwỳr rãhã ho ri ixpa nê wa kãm:

—Pa Tirtũm mẽ Pahihti wa. Nà Xitre ho na pa wa awỳ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê àmnhĩx pa ho pa. Aně.

*Kris kwỳ hkrãhtũmjaja kot tanhmã amnhĩ nhĩpêx to kaxyw mẽ hã kãm karõ*

*Wam Ximotre 3.1-13*

<sup>5</sup> Nê na pa pre Kret rũm inhnojarêt hãmri nê amã axapênh ã karõ nê Kret kãm are nê man mō. Na pa pre amã:

—E kêr ka jar arĩk nê mẽ kãm ixkapër jarěnh jatur xãm mēnh o mẽ hkôt apa. Nê Kris kôt pahkwỳjê mã mẽ hkrãhtũmjê xunhwỳ. Kret kãm krĩ piitã hkôt. Na pa pre ixprĩ hã tanhmã amã mẽ harěnh to. Tã kêr ka ate inhmar xà hkôt mẽ hkwỳjê kapi nê mẽ

unhwÿ. Koja mẽ ã amnhĩ nhĩpêx anhÿr o pa ka ja hã mẽ omu mẽ mẽ unhwÿ.

<sup>6</sup> Koja mẽ tãm amnhĩ nhĩpêx o pa nhũm mẽ piitã axpên mã mẽ mex ã mẽ harê.

Nẽ mẽ hprõ pix tânopxar o pa mẽ kuhpa hã nhãm mēnijê ho amnhĩkati hkêt nẽ.

Nẽ kê mẽ hkrajaja hipêêxà pyrà mẽ amnhĩ kaxyw Jejus kôt hamaxpêr o pa. Jao hipêêxà mẽ katorxà wa kapêr ma mẽ wa hkôt amnhĩ nhĩpêx. No ri htÿx ri amnhĩ tomnuj o pa hkêt nẽ.

Anhÿr o na pa pre mẽ hã amã karõ. <sup>7</sup> Jejus kôt pahkwÿjê hkrãhtũmjaja kot Tĩrtũm nhÿ hã hkrajê mã kapêr mex o pa jakamã na htem tãm amnhĩ nhĩpêx o pa.

Nẽ amnhĩ pix kukamã hamaxpêr o pa hkêt nẽ.

Nẽ gryk tokyx anhÿr kêt nẽ.

Nẽ kagôxyhti japrôr nẽ ho pipãnh o pa hkêt nẽ.

Nẽ oprê ho pa hkêt nẽ.

Nẽ kàxpore rũnh prãm xàj hêx rom tanhmã amnhĩ nhĩpêx to hkêt nẽ.

Na htem ã amnhĩ nhĩpêx anhÿr hkêt nẽ.

<sup>8</sup> ãm àmnhĩx amnhĩ nhõrkwÿ hwÿr mẽ hwÿr o pa.

Nẽ mẽ piitã mẽ kutã nojarêt rãhã nẽ.

Nẽ tãm hamaxpêr nẽ tãm mẽ piitã mẽ hipêx o pa.

Nẽ amnhĩ tomnuj pymaj amnhĩ to htÿx pē Tĩrtũm kôt amnhĩ nhĩpêx mex rãhã ho pa.

<sup>9</sup> Nẽ mẽ kot Tĩrtũm kapêr mar tÿx jakamã kê mẽ arĩ hã nohtÿx nẽ mar tÿx xà hkôt amnhĩ xô ri ho hkwÿjê jahkre mex o pa.

Nẽ ho mẽ piitã mẽ hamaxpêr o hihtÿx o pa.

Nhũm mẽhõ Tĩrtũm kapêr kwÿm ri tanhmã ujarênh to nhũm hã kuma mẽ hprĩ hã kãm

tanhmã harēnh to kê mar mex nē.  
 E Xitre. Na hte ã Jejus kwỳjê hkrãhtũmjaja amnhĩ  
 nhĩpêx anhỹr o pa. Jakamã kêr ka aprĩ hã Kret kãm  
 Jejus kôt pahkwỳjê kapi nē mẽ kot tanhmã amnhĩ  
 nhĩpêx to ho pa hã mẽ omu. Nhũm mēhõ ã amnhĩ  
 nhĩpêx anē ka ja hã omu hãmri nē kêp Jejus kwỳjê  
 hkrãhtũm kaxyw ãm.

*Kret nhõ xwỳnhjaja kot tanhmã amnhĩ tomnuj to  
 hã mẽ harēnh  
 Xitre 3.9-11*

<sup>10</sup> Nē atar Kret kãm na hte mẽ ohtô nē kãm mẽ  
 õ pahi kapêr mar prãm kêt nē htỳx ri tanhmã Kris  
 kwỳjê mã kapêr to ho pa. Na hte Ijaew kwỳjaja ã  
 amnhĩ nhĩpêx anhỹr o pa. Jao Ijaew kêt xwỳnh kot  
 Jejus kôt amnhĩ xunhwỳr xwỳnhjê mã kãm:

—Kwa mẽ ixpyrà nē mẽ ixpê Ijaewjê kot amnhĩ  
 nhĩpêx kôt mãn amnhĩ nhĩpêx kêt wehe.

<sup>11</sup> Anhỹr o mẽ kãm kapêr jakamã kwa kêr ka ã  
 mẽ kapêr anhỹrja nē mẽ kãm akapêr kãm axihtỳx  
 nē. Na htem hpijaàm kêt o hikàxpore hprãm xàj  
 ã mẽ kãm kapêr anhỹr o pa. Jao mẽ hamaxpêr o  
 ahkà nhũm mẽ kuma nē tee ri hamaxpêr. <sup>12</sup> Na pre  
 ra mẽ hkwỳjê hõ tanhmã mẽ harēnh to. Mẽ ahkre  
 xwỳnhjê hõja mẽ harēnh o:

—Kret nhõ xwỳnhjaja na htem hêx pix o pa.  
 Nē oprê nē kãm kaga nē apkur xà pix kukamã  
 hamaxpêr o pa. Anē.

<sup>13</sup> ãm hãmri ã mẽ harēnh kot anhỹr. ã mẽ kot  
 amnhĩ nhĩpêx anhỹr jakamã kwa mẽ kot amnhĩ  
 nhĩpêxja nē mẽ kãm akapêr kãm axihtỳx o ri mẽ  
 hkôt apa Xitre. Kê mẽ ã amnhĩ nhĩpêx anhỹr kêt  
 nē. Nē mẽ kãm anē kê mẽ amnhĩ kaxyw Tĩrtũm kôt

mãn hamaxpěr tỳx nẽ. <sup>14</sup>Nẽ kê mẽ axte Ijaewjê xujarẽnh nẽ mẽ kot amnhĩ nhĩpêx kôt amnhĩ nhĩpêx kêt nẽ. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapěr kaga hpa. <sup>15</sup>Mẽ kot Jejus kôt amnhĩ xunhwỳr xwỳnhjaja tãm mẽ hamaxpěr o pa jakamã na htem Tĩrtũm kot mẽmoj piitã ho kator xwỳnh pumu nẽ piitã mex ã harẽ. No mẽ kêp Jejus kwỳ hkêt xwỳnhjaja na htem hamaxpěr punuj pix o pa. Nẽ mẽmoj mex pumu nẽ mex kêt ã harẽ. Mex tã nhũm mex kêt ã harẽnh o pa. <sup>16</sup>Nẽ mẽ kêp Tĩrtũm kra hã amnhĩ jarẽnh tã amnhĩ tomnuj pix o pa. Jao kêp hkra hã amnhĩ jarẽnh o hêx nẽ kapěr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nẽ kãm mẽ hkĩnh kêt nẽ. Tĩrtũm mã mẽ kot amnhĩ to mex kwỳ mẽ hã jêt kêt kumrêx.

## 2

<sup>1</sup>E Xitre kot paj tanhmã ate mẽ ahkre hto hã amã karõ ka inhma nẽ amnhĩ xô ri mẽ kãm hã karõ ho ri apa.

*Mẽmy wejjaja kot tanhmã amnhĩ nhĩpêx to kaxyw mẽ hã kãm karõ*

<sup>2</sup>Nẽ kêr ka mẽmy wejjê mã anẽ kê mẽ amnhĩ to àptàr mex nẽ pa.

Nẽ pipãnh nẽ ri pa hkêt nẽ.

Nẽ mẽ gryk kaxyw htỳx ri hkwỳjê hã hpěr o pikẽnh kêt nẽ.

Kê mẽ tãm hamaxpěr nẽ tãm amnhĩ nhĩpêx o pa. Nẽ amnhĩ kaxyw Jejus kôt hamaxpěr tỳx rãhã nẽ.

Nhũm mẽ hkwyjaja kot mẽmoj tã tanhmã mẽ  
 homnuj to htã kê mẽ arĩ tãm amnhĩ nhĩpêx o  
 pa nẽ amnhĩ tã tanhmã mẽ ho hkêt nẽ.  
 E kër ka ã mẽmy wejjê mã ja hã akarõ anẽ.

*Mëni wejjaja kot tanhmã amnhĩ nhĩpêx to kaxyw  
 mẽ hã kãm karõ*  
*Wam Korõt 14.34-35; Wam Ximotre 2.9-15, 3.11;  
 Wam Pêtre 3.1-6*

<sup>3-4</sup> Nẽ mẽni wejjê mã anẽ kê mẽ kãm Jesus kĩnh  
 xàj tãm ri amnhĩ nhĩpêx o pa.

Jao xypên jakwa kamã nhãm mẽ hixi ho rêr o pa  
 hkêt nẽ.

Nẽ kagôxyhti ho pipãnh o pa hkêt nẽ.

Nẽ mẽ kãm anẽ kê mẽni xàptàr nywjê jahkre mex  
 o pa. Mẽ kot mẽ mar nẽ mẽ uràk nẽ tãm amnhĩ  
 nhĩpêx kaxyw. Jao mẽ kãm mẽ mjên nẽ mẽ  
 hkrajê japê hã mẽ kãm mẽmoj to anhỹr o mẽ  
 kutã nojarêt rãhã ho pa.

Kër ka ã mẽni wejjê mã akapêr anẽ.

*Mëni xàptàr nywjaja kot tanhmã amnhĩ nhĩpêx to  
 kaxyw mẽ hã kãm karõ*

<sup>5</sup> Nẽ mẽni xàptàr nywjê mã anẽ kê mẽ tãm  
 hamaxpêr pê tãm amnhĩ nhĩpêx o pa.

Nẽ mẽ òrkwỹ kamã àpênh mex o pa.

Nẽ mẽ mjên kapêr ma nẽ hkôt amnhĩ nhĩpêx.

E. ã mẽni xàptàr nywjê mã karõ anẽ. Koja mẽ ã  
 amnhĩ nhĩpêx anhỹr o pa hãmri nhũm mẽ piitã mẽ  
 kot amnhĩ nhĩpêx ã mẽ omu nẽ mẽ harênh o:

–Tĩrtũm kapêrja mex kumrêx. Mẽ kot hkôt  
 amnhĩ nhĩpêx o mẽ pa xwỳnhjaja na htem tãm  
 amnhĩ nhĩpêx mex o pa. Anẽ.

*Měmy xàptàr nywjaja kot tanhmã amnhĩ nhĩpêx to kaxyw mẽ hã kãm karõ*

*Wam Ximotre 4.12; Sikũn Ximotre 2.22; Wam Pêtre 5.5*

<sup>6</sup> Nê kêr ka mẽmy xàptàr nywjê mã anê kê mẽ mẽmoj punuj pê amnhĩ to htỳx o pa. Mẽ hamaxpêr punuj nê mẽ kot tanhmã amnhĩ tomnuj to pê amnhĩ to htỳx o pa.

<sup>7</sup> Nê kêr ka ajaxwỳja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwỳm ri tanhmã amnhĩ nhĩpêx to hkêt nê. ãm Tĩrtũm ã apijaàm o akatàt kôt mẽ kãm kapêr o mẽ ahkre pê tãm amnhĩ nhĩpêx o ri apa.

<sup>8</sup> Nê kêr ka tãm akapêr rãhã ho ri apa. Kêr kê mẽ kãm mẽ pahkurê xwỳnhjaja ja hã ama nê amnhĩ kamã hpijaàm hãmri nê apê Kris kwỳ hã tanhmã ato kapêr punuj to hkêt japêr.

*Mẽ kãm mẽ àpênh xwỳnhjaja kot tanhmã amnhĩ nhĩpêx to kaxyw mẽ hã kãm karõ*

*Epes 6.5-8; Korosẽ 3.22-25; Wam Ximotre 6.1-2; Wam Pêtre 2.18-25*

<sup>9</sup> Nê kêr ka mẽ kãm mẽ àpênh o mẽ pa xwỳnhjê mã anê kê mẽ õ patrãw kãm hprãm xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê. Nê amnhĩ tã tanhmã mẽ kãm kapêr punuj to hkêt nê.

<sup>10</sup> Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm mẽ õ patrãw amnhĩ tã mẽ omu mẽ mẽ ÿ hã hkĩnh mẽ pa. Hãmri mẽ hamaxpêr o:

—Hêxta waa mẽ. Inhmã àpênh xwÿnhhta na hte inhmã àpênh mex o pa. Na hte ixkukrêx mẽ ixkrit jamãr mex mẽ ixpê mẽmoj to àhkĩnh kêt mẽ. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

*Tanhmã Jejus kãm mẽ pajapê xàj amnhĩ nhĩpêx to hã harênh*

*Epes 2.8-10; Wam Tesarõn 1.9-10*

<sup>11</sup> Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahtĩr tũm mẽ papa ho papa. <sup>12</sup> Na hte ã mẽ pamã kapêr o amnhĩrĩt anê mẽ mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa mẽ axte tanhmã amnhĩ tomnuj to mẽ tanhmã ajamaxpêr punuj to hkêt mẽ. Mẽ ate amnhĩ tomnuj pê amnhĩ to htÿx mẽ ixkapêr kôt pix mã ri amnhĩ nhĩpêx rãhã mẽ. Anê.

<sup>13</sup> Na pu htem ã amnhĩ nhĩpêx anhÿr o papa jao pahkĩnh mẽ mẽ papytãr xwÿnh Jejus Kris jamãr o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumê pu mẽ mex o mex ã omu.

<sup>14</sup> Na pre Jejus amnhĩ grõnh kôt mẽ pahwÿr wrÿ mẽ mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa.



Měmo kaxyw na pre ã mẽ panê amnhĩ nhĩpêx anê? Nà mẽ pahpê hkwyjya na kãm hprãm. Nẽ mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nẽ mẽ pahte uràk nẽ mẽ piitã mẽ kutã panojarêt rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

<sup>15</sup> E Xitre. Ixte mẽmoj tã amã karõja kêr ka ho Kris kwỳjê jahkre mex o apa kê mẽ ama nẽ kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nẽ Tĩrtũm nhỹ hã tanhmã nê kãm akapêr to kê axte hkêt nẽ. Tã mãn ka inhma. Kêr ka ã Kris kwỳjê jahkre mex o apa anê.

### 3

*Tanhmã Kris kwỳ kot amnhĩ nhĩpêx to hã mẽ kãm karõ*

*Rõmãn 13.1-10; Epes 2.1-10*

<sup>1</sup> Nẽ kêr ka Kris kôt akwỳjê mã anê kê mẽ ho amnhĩptàr xwỳnhjê kapêr ma nẽ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

<sup>2</sup> Nẽ mẽ kãm anê kê mẽ tanhmã hkwyjê mã kapêr punuj to ho pa hkêt nẽ. Rỳ mẽmoj tã mẽ kãm àkjêr kêr nẽ. Kê mẽ tãm mẽ hipêx nẽ mẽ kamã ukapřĩ pẽ mẽ ho mex rãhã ho pa. Na hte ã Kris kwỳjaja axpẽn nhĩpêx o pa anê. <sup>3</sup> Kormã mẽ pahte hkôt amnhĩ xunhwỳr kêr ri na pu prem ã amnhĩ nhĩpêx anhỹr kêr nẽ. Na pu prem Tĩrtũm mã pajamaxpêr kêr nẽ kapêr kôt ri amnhĩ nhĩpêx hkêt nẽ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã

tanhmã amnhĩ nhĩpêx to ho ri papa. Nê axpên tomnuj nê. Nê axpên kãm pagryk rãhã ho papa. ã mẽ pahte amnhĩ nhĩpêx anhÿr ho papa jakamã nhũm pre mẽ piitã kãm mẽ pahkĩnh kêt nê. Pu mẽ pajaxwÿja pamã mẽ hkĩnh kêt nê.

*Tanhmã Tĩrtũm kot mẽ pahto mex to hã harênh Rõmãn 5.6-8; Epes 2.4-10*

<sup>4</sup> Tã pu prem Tĩrtũm kêp mẽ papytãr xwÿnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukaprĩ hã harênh ma. <sup>5-6</sup> Hãmri nê amnhĩ kaxyw hkôt pajamaxpêr nê hkôt amnhĩ xunhwÿ nhũm amnhĩ tã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukaprĩ nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nê mẽ pahwÿr amnhĩ Karõ rê nhũm mẽ pahwÿr agjê nê mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwÿr amnhĩ Karõ rênh anê. <sup>7</sup> Tã mẽmo kaxyw na pre ã mẽ pahto mex anê? Nã kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwÿnh tã kãm mẽ pajapê htÿx nê kãm tanhmã mẽ pahto hprãm kêt nê. Nê mẽ pahwÿr Kra Jejus mẽ nhũm wrÿ nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwÿr xwÿnhjaja Jejus kukwak

ri mẽ pahpê Tĩrtũm kraa. ã na pre Jejus mẽ pahto mex anê. Jakamã kot puj mẽ nhỹrmã Tĩrtũm mẽ wa kuri pahťĩr tũm nê pamex nê papa ho papa. Koja wa nhỹrmã ã mẽ pahto mex anê.

<sup>8</sup> ãm hãmri na pa amã ã ja jarẽnh anê Xitre. Jakamã kwa kêr ka inhma nê inhmar tỳx nê. Nê ho amnhĩ kaxyw Tĩrtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

<sup>9</sup> Nê mẽ kot htỳx ri mẽmoj tã axpẽn mã àkjêr o mẽ pa xwỳnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rỳ finat Mojes kot Tĩrtũm nhỹ hã kapêr ã axpẽn mã mẽ àkjêr xwỳnhjê hkôt apa hkêt nê. Na htem ã ri axpẽn mã àkjêr anhỹr o pa nê tãm amnhĩ nhĩpêx kêt nê.

<sup>10</sup> Nê koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nê hã axpẽn mã akir nê axpẽn pê pikjêr kaxyw. Ka ja hã omu nê ã kapêr anhỹrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhỹr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwỳjê hkôt ri pa hkêt nê. <sup>11</sup> ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrĩt.

*Pawre kot kagà jatur xà kamã tanhmã Xitre mã kapêr to*

<sup>12</sup> Nē kot paj tokyx ma Nīkop wỳr mō. Kêr pa tokyx hwỳr pōj nē amgrà pē krī nhō xwỳnhjê hkôt ixpa. Jakamã kot paj tokyx ma awỳr Atēmti rỳ Xikitre mē. Kê mō nē awỳr pōj ka tokyx tanhmã amnhĩ to hpa nē man ixwỳr mō pu mē Nīkop kamã axpēn pumu.

<sup>13</sup> Nē ota mē akuri Apor mē axiwôkat Jēntija. Koja wa mēmo arīgro hã ma krī hō hwỳr nojarêt ka wa kãm mē apkur xà hkwỳ gō kê wa ma ỳ kamã mōr kêt nē.

<sup>14</sup> Nē kêr ka Kris kwỳjê mã anē kê mē arī òrkwỳ pix kãm hkrī ho hkrī hkêt nē. Kê mē tanhmã axpēn to mex to ho axpēn kôt pa. Nhũm mēhō kēp amrakati kê mē tanhmã ho ajuta hto. Mē kãm anē kê mē ã axpēn nhĩpêx anhỹr o pa.

<sup>15</sup> Nē ota jar Kris kôt pahkwỳjê piitã awỳr hpēr mē Xitre. Nē kêr ka atar Kris kôt mē pahkràmnhwỳjê mã mē ijarē.

E ãm ja pix. Kê Pahiti Jejus mē akutã nojarêt rãhã ho pa. Ixpê Pawre na pa amã ã ixkapēr nē hã kagà nē awỳr mēnh anē.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 21 Feb 2024 from source files  
dated 29 Jan 2022

383a4e22-34cd-505f-9cc2-2f9921e7aa9f